

AGRICULTURA BIOLOXICA E AGRICULTURA ECOLOXICA

En maio pasado a prensa difundia un informe do "Grupo de Traballo Ambiental" de Estados Unidos que alertava sobre a incidencia da má alimentación na xeneración de cancro nos/as xóvenes americanos/as. Decenas de millóns de nenos e nenas estadounidenses ven-se expostos/as a enfermidades como o cancro, entre outras, polo consumo de frutas e verduras contaminadas con pesticidas empregados na agricultura. Por eses mesmos días (finais de abril) criava-se na Galiza a Coordenadora de Agricultura Ecolólica (CAE) de Galiza, co apoio da Xunta de Galicia.

Saúdamos esta nova iniciativa, na esperanza de que sexa un paso en firme na promoción da agricultura biolóxica ou orgánica. Esta alternativa agrícola ten como obxectivos a producción de alimentos sans mediante prácticas agrícolas respeituosas co meio ambiente, de forma que se garanta a sustentabilidade dos recursos e se evite a contaminación derivada das prácticas agrarias. A CAE-Galicia utiliza porén o termo de agricultura ecolólica, que na definición aportada por persoas como Sevilla Guzmán implica algo mais; implica tamén a creación de relacións comerciais mais éticas e xustas, buscando a igualdade entre os agriculto-

res, que devén ser tamén distribuidores dos seus produtos, e os consumidores. Na agricultura ecolólica pois, minimizan-se os insumos externos (abonos, maquinaria, etc) facendo as explotacións mais autosuficientes e independentes dos subministros das multinacionais. Racha tamén coa distribución dos alimentos a través das cadeas das multinacionais, nas que hoxe nos vemos obrigados a mercar.

Naturama CERTAMENDE VIDEO SOBRE MEDIO AMBIENTE

O Centro Nacional de Educación Ambiental (CENEAM) organiza a segunda edición do certamen de vídeo sobre medio ambiente Naturama, a celebrar en Balsain do 20 ao 24 de outubro de 1994. A programación consta dunha Sección Oficial e varias Seccións Informativas. A temática a presentar é do mais ampla posible, incluindo calquera aspecto ambiental. Poden-se apresentar traballos nas categorías de Documental ou de Divulgación, en ambos casos coas modalidades de profesional e afeizado. Poderán-se presentar obras realizadas durante os anos 92, 93 e 94. O prazo de inscripción remata o 1 de setembro de 1994. Para máis información dirixirse á:

Centro Nacional de Educación Ambiental. Valsaín-San Idelfonso.


40109-Segovia. Tels. (921)471711-471744, Fax. (921) 471746

ACTIVIDADES XUVENIS NO CONCELLO DE OLEIROS


O Concello de Oleiros pretende un verán movido, con actividades durante xullo e agosto que incluen cicloturismo, campamentos, travesías marítimas, vela, remo, natación e outros deportes, artes plásticas, obradoiros de coiro, video e fotografía, música, teatro, viaxes e ainda mais. Estas actividades incluen unha viaxe a Praga, para "estreitar lazos de solidariedade cos povos da vella Europa para coñecermos e facermos esa Europa que queremos, multiétnica e intercultural. Contan tamén con estadias en Oleiros de xóvenes checos e de rapazas e rapaces saharianos. Información: Ponencia de Cultura, Tfno. 610000, ou Casa da Xuventude, Tfno. 636598. Oleiros.

REPRESENTANTES ECOLOXISTAS NA ADMINISTRACIÓN HIDRÁULICA

O Governo Central acedeu á continuada reivindicación de introducir representantes do movemento ecoloxista nos organismos da Administración da Agua. Aos tres representantes no "Consejo del



**¡NOU HAI COIDADO, OS VERQUÍDOS VEÑEN AQUÍ, PE-
RO NESTA URBANIZACIÓN SON TODOS ESTRAIXEIROS!**



Agua" ven a sumar-se a representación nas Confederacións Hidrográficas. A C.H. Norte I, que afecta aos ríos Miño, Sil e Lima, engloba-se na C.H. Norte, que abarca desde Euskadi até Galiza, a que lle corresponden 2 representantes. As dificultades de elección de dous representantes entre os grupos "mais representativos" (así o definiu a Administración) actuantes nas diferentes comunidades pudo resolverse en base a un criterio de rotación anual, aceptado por todos os grupos. Tamén se acordou reivindicar cando menos un representante por Comunidade autónoma e se concordou na necesidade de que as competencias hidrolóxicas sexan transferidas na sua totalidade ás respectivas Comunidades. Os representantes galegos na Confederación Norte para os próximos tres anos son Matias Rodríguez e Manuel Soto, en representación de Cedenat e Adega, grupos que presentaron alegacións ao Plan Hidrolóxico Norte I, e da Asemblea de Grupos Ecoloxistas e Naturalistas de Galiza (AGENG).

Esta reivindicación fica sen resolver, porén, no caso das concas hidrográficas con competencias transferidas a Xunta de Galiza, Galiza-Costa, e cuxo organismo de conca é a Consellería de Ordenación do Territorio.



Anida, o colectivo naturalista de Silleda editou o segundo número do seu boletín, Caderno da Natureza AVELAIONA, no que se tratan temas de importancia actual como as concentracións parcelárias, os danos da chuvia ácida ou as batidas ao lobo, alén doutros temas locais como o proxecto de variante da carretera para circunvalar Silleda, que amazia con destruir a mais grande carballeira próxima a vila..

CASA DA TERRA

A Casa da Terra organiza para este verán varios campamentos, nun primeiro turno para rapaces/as de 6 a 10 anos (do 21 ao 27 de xullo), e nun segundo turno para mozos e mozas de 11 a 14 anos e de 15 a 17 anos (do 17 ao 31 de agosto). A Casa da Terra é unha casa de campo en Antas de Ulla, a carón deste río. Para máis información, tlfno. 981-246995.

Fundamentalismo ou miserabilismo?

Así titula María Adelaida Chichorro Ferreira, membro do grupo Quercus portugués, un seu artigo sobre a incineración en Portugal, aparecido no Público do 21 de maio pasado. No país veciño están programadas duas incineradoras de lixo, a situar unha delas en Lisboa e a outra en Porto. Mientras outros países dan marcha atrás na incineración, Portugal parece querer seguir este modelo, e a Xunta copia-lles literalmente. María Adelaida pregunta-se por que muitas empresas que grafan os símbolos da reciclaxe nos seus produtos e embalaxes están a apoiar tais proyectos de incineración: *Tem-se vindo a criar, no nosso país, um poderoso "lobby" en defensa das centrais de incineración, a que não são alheias as industrias da pasta de papel, da embalagem, dos plásticos e, como não poderia deixar de ser, o "lobby" dos hipermercados. Os argumentos usados revelam um miserabilismo verdadeiramente militante, reflexo provável de uma estratéxia de "marketing" visando captar a branda pequenice atribuida (se calhar até injustamente) a generalidade dos portugueses.*